



Da la partida a la radunanza: La deputada Silvia Casutt-Derungs e Silvio Schmid da Sadrin-Andermatt Pencilaras.



La gastronomia è ina part impurtanta dal turissem: Marc Tischhauser, il mainagestiu da Gastro Grischun, e Sepp Caluori, il president da quella associaziun (da san.).



Yvonne Brigger da la ITG en discurs cun René Hefti da Valbella.



Peter Engler, el è il president da la ITG, l'organisaziun d'interess per il turissem grischun.



Jürg Domenig, il mainafatschenta da Hotelleriessuisse Grischun, ed il president Ernst Wyrsh (da san.).



Martin Vincenz (a san.), il director da Grischun Vacanzas, e Jürg Schmid, il president da quella organisaziun.

FOTOS G. N. STGIER

Ils giasts svizzers èn fidaivels

Laax: Radunanza annuala da Grischun Vacanzas

DA GION NUTEGN STGIER / ANR

■ L'onn 2018 èn las pernottaziuns s'augmentadas en il Grischun per 5,7%. Anc sa lascha quel dumber na cumparegliar cun las pernottaziuns d'avant 10 onns. Jürg Schmid resta per ils proxims trais onns president da l'organisaziun turistica. Grischun Vacanzas è l'organisaziun tetgala dal turissem da noss chantun. A quella organisaziun appartegnan 18 destinaziuns da vacanzas da l'entir chantun. En noss chantun datti passa 700 hotels e lura 70 000 abitaziuns secundaras. Vitiers vegnan lura anc las bunamain 8000 abitaziuns che vegnan affittadas per vacanzas. Grischun Vacanzas segna cunzunt per il marketing naziunal e cunzunt er internaziunal.

Anc mancan ils giasts chineis

L'acziun da carmalar dapli giasts da l'Asia e dals Stadis dal Golf haja bain carmalà intgins giasts da quella naziun en il Grischun, dentant saja anc in grond potenzial, ha ditg Jürg Schmid. La Svizra haja 23% giasts da l'Asia e da l'Orient ed en il Grischun giaschia quella cifra tar 6%. Cun acziuns e promoziun pi intensivas vulesch Grischun Vacanzas daventar anc pi activ cun il marketing en quels pajais. Insumma hajan ils hotels grischuns anc in grond potenzial cun in'occupaziun annuala da 31%, ha menziunà Schmid. Martin Vincenz, il director da Grischun Vacanzas, ha ditg ch'il giast resta oz be pli 2,6 dis en in hotel, quai che saja en cumparaziun cun il Vorarlberg cun ina media da 3,6 bain in pau pli pauc.

61% èn giasts svizzers

L'onn passà han 5,132 milliuns giasts pernottà en il Grischun. Quai èn 5,7% dapli che anc l'onn precedent. En cum-



Ils turistichers èn ids ad aut ier per salvar la radunanza da Grischun Vacanzas.

paraziun cun las autras grondas destinaziuns da vacanzas da la Svizra e dals pajais vischins ha il Grischun gi il pli grond augment tar las pernottaziuns l'onn 2018. Il Vallais ha gi 5,3% dapli pernottaziuns, la Surselva bernaisa 5,0% dapli giasts, il Vorarlberg ha scrit in augment dad 1,2%, il Tirol, noss grond concurrent, ha fatg 2,1% dapli pernottaziuns e tar il Tirol dal sid giaschia quel augment tar 2,0%. 61% dals giasts che pernotteschan en il Grischun derivan da la Svizra, 17% da la Germania, e bunamain 7% dals Stadis Unids da l'America, da l'Olanda e da l'Engalerra. Sin facebook ha il Grischun da preschent gia 209 993 fans e la pagina d'internet da Grischun Vacanzas ha gi passa dus milliuns uschenumnads «clicks» be l'onn passà. Gist tschintg milliuns giadas èn ils divers videos da Grischun Vacanzas vegnids guardads sur la plattafurma youtube. La plat-

tafurma GRhome ha fin oz 8000 partenaris, è vegni ditg ier a Laax sin il Crap Sogn Gion.

Tuts restan en suprastanza

En tavla èn er stadis elecziuns e positiv è che da la suprastanza n'aveva nagin demissionà. Cun applaus han lura ils preschents reelegi Jürg Schmid sco president da Grischun Vacanzas per ils proxims trais onns. El è en tuttas modas e manieras in um dal rom, cun esser stà blets onns director da Svizra Turissem ed er cun avair relaziuns e buns contacts sin l'entir mund. Ultra da quai ha el cun il Grischun ina relaziun fitg stretga, cun avair a Lai in'abitaziun da vacanzas. Confermads en lur uffizis èn er vegnids Andreas Züllig, il vicepresidente da l'organisaziun, Corinne Denzler, Markus Gschwend, Renato Fasciati e Reto A. Wilhelm.



Tranter ils turistichers: Kevin Brunold, Surselva Turissem, Marcus Caduff, cusseglier guvernativ, e Stefan Engler, cusseglier dals chantuns (da san.).